

I roto i te mau mea papû ore e te mau titauroa e rave rahi ta tatou e farerei nei i roto i to tatou oraraa, te titau nei te Atua ia tatou ia rave ia au i to tatou puai hope, ia rave i tei au i to tatou iho hinaaro e eiaha ra tatou ia faahepohia (a hi'o 2 Nephi 2:26), e ia ti'aturi Ia'na. Eita paha tatou e ite i te melahi, e faaroo i te reo no te ra'i mai, e aore râ, e farii i te mau iteraa varua faahiahia. E mea pinepine paha tatou i te haere i mua ma te ti'aturi e ma te pure—aita râ e ti'aturi hope roa—ia rave tatou mai te au i te hinaaro o te Atua. Tera râ, mai te mea e, e faatura tatou i ta tatou mau fafauaraa e e haapa'o i te mau faauerua, mai te mea e, e tautoo tatou ma te tamau maite i te rave i te maitai e ia riro mai ei taata maitai a'e, e nehenehe ia tatou ma te ti'aturi papû e, e arata'i te Atua i to tatou mau taahiraa. E e nehenehe ta tatou e paraparau ma te ite papû maitai e, e faauru mai te Atua i ta tatou mau parau. Teie te tahi auaa o te papa'iraa e parau ra e : « Ei reira to outou ti'aturiraa e puai roa ai i mua i te aro no te Atua » (PH&PF 121:45).

Mai te mea e, e imi maite e e faaohipa outou i te varua o te heheuraa, te fafau atu nei au ia outou e, « na te parau maramarama a te Fatu [outou] i te haere » (Isaia 2:5 ; 2 Nephi 12:5). I te tahi taime, e ohipa te varua o te heheuraa ma te vitiviti e ma te puai, i te tahi atu taime e ohipa oia ma te ha'iha'i, e ma te haere marû noa, e e mea pinepine oia i te ohipa ma te marû roa, fatata aita e itehia. Tera râ, noa'itu te huru a fariihia ai teie haamaitairaa, na te maramarama ta'na e horo'a mai e haamaramarama e e faai i to outou varua, e haamaramarama i to outou haroaroa (a hi'o Alama 5:7 ; Alama 32:28), e arata'i ho'i e e paruru ia outou e i to outou utuafare.

Te faaite nei au i to'u iteraa aposetolo e, te ora nei te Metua e te Tamaiti. E parau mau te varua o te heheuraa—e e nehenehe e e ohipa oia i roto i to tatou oraraa tata'itahi e i roto i te Ekalesia a Iesu Mesia i te Feia Mo'a i te Mau Mahana Hopea Nei. Te faaite papû nei au i teie mau parau mau na roto i te i'oa o te Fatu o Iesu Mesia ra, amene. ■



Na te peresideni Thomas S. Monson

Te Hiero Mo'a— E Mori no to te Ao nei

Te mau haamaitairaa teitei a'e e te ti'araa melo i roto i te Ekalesia o te mau haamaitairaa ia o ta tatou e farii i roto i te mau hiero o te Atua.

E au mau taea'e e au mau tuahine, te faatae atu nei au i to'u here e te aroha ia outou tata'itahi e te pure nei au ia arata'i mai to tatou Metua i te Ao ra i to'u mau mana'o e ia faauru mai i ta'u mau parau a paraparau atu ai au ia outou i teie mahana.

Te hinaaro nei au e haamata na roto i te faaiteraa i te hoê e aore râ, e piti mana'o no ni'a i te mau parau poro'i nehenehe roa ta tatou i faaroo i teie po'ipo'i na roto mai i te tuahine Allred e te Episekopo Burton, no ni'a i te faanahoraa Totauturu a te Ekalesia. Mai tei faaithehia'tu, teie matahiti te 75raa o te matahiti o teie faanahoraa faauruhia o tei haamaitai te oraraa o te mau taata e rave rahi. Ua fana'o vau i te iteraa i te tahi o te mau taata tei haamau i teie ohipa rahi—ei mau tane tei i te aroha e te paari.

Mai ta Bishop Burton e te tuahine Allred i parau a'e nei, ua horo'ahia i te episekopo o te paroita te hopoi'a no te aupuru i te feia nava'i ore i roto i te oti'a o ta'na paroita. Ua farii au i te reira haamaitairaa, ei episekopo apî, a faatere ai au i te hoê paroita i Salt Lake City, 1.080 rahiraa melo i roto, e 84 o ratou e mau vahine ivi. E mea

rahi o ratou ua titauhia ia tauturu. E mauruuru rahi to'u no te faanahoraa Totauturu a te Ekalesia e no te tauturu a te Sotaiete Tauturu e a te mau pûpû autahu'araa.

Te faaite nei au e, na te Atua Manahope i faauru mai i te faanahoraa Totauturu a te Ekalesia a Iesu Mesia i te Feia Mo'a i te Mau Mahana Hopea Nei.

I teie nei, e au mau taea'e e au mau tuahine, i teie amuiraa e ti'a ai e toru matahiti i teie nei to'u paturu-raa-hia ei Peresideni no te Ekalesia. Ua riro teie nau matahiti ei mau matahiti ohipa roa, e ua i te mau titauroa e rave rahi, ua i atoa râ i te mau haamaitairaa rau. Ua riro te mau taime a haamaitai ai e a haamaitai faahou ai au i te mau hiero ei mau haamaitairaa hau roa i te oaoa e te mo'a, e te hinaaro nei au e paraparau atu ia outou i teie mahana i te parau no te hiero.

I roto i te amuiraa rahi no atopa 1902, ua faahiti te peresideni Joseph F. Smith, Peresideni no te Ekalesia, i roto i ta'na a'oraa iritiraa, i te ti'aturiraa e, ia tae i te hoê mahana, « e patuhia ai te mau hiero i te mau vahi rau o te [ao] nei i reira ratou e hinaarohia ai no te maitai o te mau taata ».¹

I roto i na hanere e pae ahuru matahiti matamua i muri mai i te faati'a-raa-hia te Ekalesia, mai te matahiti 1830 e tae atu i te matahiti 1980, e 21 hiero tei patuhia, tai'o atoa i te hiero no Kirtland, i Ohio, e no Navu, i Illinois. A faaau na i te reira i na matahiti e 30 mai te matahiti 1980, 115 hiero i patuhia e i haamo'ahia. Ia amuihia na hiero apî i faaitehia'tu i nanahi ra, te vai faahou ra ia e 26 hiero te hamanihia nei e aore râ, te haamatahia ra i te hamani. E haere teie numera i te rahiraa.

Te opuaraa ta te peresideni Joseph F. Smith i ti'aturi i te matahiti 1902, te tupu nei ia te reira. To matou hinaaro, o te haafatataraa ia te hiero i to tatou mau melo.

Hoê o te mau hiero e patuhia nei i teie taime, tei Manaus ia, i Paratira. E rave rahi matahiti i ma'iri a'e nei ua tai'o vau i te parau no te hoê pûpû hau atu i te hanere melo i roto, tei faaru'e i Manaus, i ropu maitai i te uru raau ûa no Amazon, no te fano atu i te hiero fatata a'e, i Sao Paulo, Paratira—fatata e 4.000 kirometera te atea i Manaus. Ua fano atu teie mau melo faaroo na ni'a i te poti e maha mahana na ni'a i te anavai pape no 'Amazonie' e to'na mau aveave anavai. Ia hope teie ratereraa na ni'a i te pape, ua ta'uma ratou i ni'a i te mau pereoo uta taata no te tahi â ratereraa e toru mahana na ni'a i te purumu iino, aore rea rii maa no te tamaa e aita e vahi taotoraa. I muri a'e e hitu mahana e te pô, ua tae ratou i te hiero no Sao Paulo, i reira te rave-raa-hia te mau oro'a mure ore. Mai te reira atoa ia te ati no te tere faaho'iraa. Area râ, ua farii ratou i te mau oro'a e te mau haamaitairaa o te hiero, e noa'tu e, ua pau roa ta ratou moni, no ratou iho râ, ua î ia ratou i te varua o te hiero e i te mauruuru i te mau haamaitairaa ta ratou i farii.² I teie nei, e rave rahi matahiti i muri a'e, te oaoa nei to tatou mau melo i Manaus a hi'o ai ratou i ta ratou iho hiero ia haamanihia i te hiti anavai no Rio Negro River. Te horo'a nei te mau hiero i te oaoa i to tatou mau melo faaroo i te mau vahi atoa e patuhia ai te reira.

Te mau faaiteraraa o te mau faatusiaraa i ravehia no te farii i te mau



haamaitairaa, e itehia i roto ana'e i te hiero o te Atua, aita te reira e oreraa i te haaputapû i to'u aau, e i te faaapî faahou i to'u mauruuru no te hiero.

E faati'a'tu vau te aamu no Tihi e no Tararaina Mou Tham e ta raua nau tamarii hoê ahuru. Ua tomo mai te taatoaraa o te utuafare i roto i te Ekalesia, eiaha ra hoê tamahine, i te omuaraa o te mau matahiti 1960, a tae atu ai te mau misionare i to ratou fenua, e 160 kirometera i te pae apatoa no Tahiti. Ua haamata ratou i te hinaaro ia farii i te mau haamaitairaa o te taatiraa o te hoê utuafare mure ore i roto i te hiero.

I taua taime ra, te hiero fatata roa a'e i te utuafare Mou Tham, te hiero ia no Hamilton i Niu Terani, hau atu i te 4.000 kirometera i te atea i te pae apatoa tooa o te râ ; e mea na ni'a i te manureva ia haere, e e mea moni roa te tarahu. Aita ta te utuafare Mou Tham e moni no te aufau i te tarahu manureva no te mea, e mea vêvê roa to ratou oraraa, hoê noa faaapu iti

na'ina'i ta ratou imimira ; e aita atoa e ohipa i ni'a i to ratou motu. No reira, ua rave te taea'e Mou Tham e ta'na tamaiti o Gérard i te hoê faootiraa fifi roa, e reva e 4.800 kirometera no te rave i te ohipa i Taratoni, i reira te hoê o ta'na tamaiti i te raveraa i te ohipa.

Ua ohipa na taata Mou Tham e toru e maha matahiti. I te roaraa o te mau matahiti, ua ho'i mai te taea'e Mou Tham ana'e i te fare hoê noa taime, no te faaipoiporaa o te hoê tamahine, e faaea noa'tu ia ta'na na tamaiti i Taratoni.

I muri a'e e maha matahiti, ua rava'i te moni i haaputuhia e te taea'e Mou Tham e ta'na na tamaiti no te afa'i i te utuafare i te hiero no Niu Terani. Ua reva te mau melo paatoa, hoê ana'e tamahine tei ore i tae, no te mea ua hapu. Ua taatihia ratou no te tau e amuri noa'tu, te hoê teie ohipa maere e te oaoa rahi.

Mai te hiero ua ho'i afaro noa te taea'e Mou Tham i Taratoni, no te rave faahou i te ohipa e piti matahiti te



Ua ite ratou e, e faufaahia te mau tusia atoa e te mau tautooraa atoa no te mau oro'a faaoraraa e fariihia i roto i te hiero o te faati'a ia tatou ia ho'i i te hoê mahana i piha'i iho i to tatou Metua i te Ao ra i roto i te hoê autaatiraa utuafare mure ore, e ia farii i te mau haamaitairaa e te mana no te ra'i mai.

I teie mahana, e rave rahi o tatou aita e fifi rahi no te haere i te hiero. E va'u ahuru ma pae i te ni'a i te hanere o te mau melo o te Ekalesia e ora nei i teie nei i roto i te area e 320 kilometera i te atea i te hiero, e no te rahiraa o tatou, e mea iti roa mai ia te atearaa.

Mai te mea e, ua tae outou i te hiero no outou iho, e mai te mea e, e mea fatata to outou faaeearaa i te hiero, ta outou tusia, o te faataaraa paha ia i te hoê taime i roto i to outou oraraa ohipa no te haere tamau i te hiero. E ohipa rahi te ti'a ia faaotihia i roto i to tatou mau hiero no te feia e tia'i nei i muri mai i te paruru. Mai te mea e, e rave tatou i to ratou mau oro'a, e ite tatou e, ua faaoti tatou i te ohipa o te ore e ti'a ia ratou ia rave no ratou iho. Ua parau te peresideni Joseph F. Smith, i roto i te hoê faahitiraa parau puai : « Na roto i ta tatou mau ohipa e rave no ratou, e marua to ratou mau fifi taamu i raro, e e pee ê te pouri e haati nei ia ratou, ia anaana mai ho'i te maramarama i ni'a ia ratou, e e faaroo ratou i roto i te ao varua i te parau no te ohipa i ravehia no ratou na ta ratou



maoro no te aufau i te tere o te tamahine tei ore i tae i te hiero na muri iho ia ratou—e tamahine faaipoipohia e ta'na tamarii e ta'na tane.

I to raua paariraa, ua hinaaro te taea'e e te tuahine Mou Tham e haere e tavini i roto i te hiero. I taua taime ra, ua oti te hiero no Tahiti i te hamanihia e i te haamo'ahia, e ua tavini raua e maha tau misioni i reira.³

E au mau taea'e e au mau tuahine, e ere te mau hiero i te ofa'i noa e te tima. Ua î râ te reira i te taata faaroo e tei haapae i te maa. Ua patuhia te reira i te tamataraa e te iteraa papû. Ua haamo'ahia i te tusia e te taviniraa.

Te hiero matamua i hamanihia i roto i teie tau tuuraa, o te hiero ia no Keterani, i Ohio. I taua taime ra, tei roto te feia mo'a i te vêvê, noa'tu râ, ua faaue te Fatu ia ratou ia patu i te hoê hiero, e ua patu ratou. Teie ta Elder Heber C. Kimball i papa'i no ni'a i te reira : « Te Fatu ana'e tei ite i te vêvê, te ati e te oto ta matou i farerei no te faatupuraa i taua ohipa ra ».⁴ E i reira, i muri a'e i te oti-maitai-raa te mau mea atoa, ua tiahihia te feia mo'a i rapae i Ohio e i to ratou hiero here. I te pae hopea ua itehia ia ratou te hoê faaeearaa—noa'tu e, no te hoê tau pototo noa—i te pae anavai no Mississippi River i roto i te tuhaa fenua no Illinois. Ua topa ratou i te i'oa o to ratou faaeearaa, o Navu, e, no to ratou

hinaaro ia horo'a faahou i te taatoaraa o ta ratou faufaa, e ma te faaroo aueue ore, ua patu faahou ratou i te tahi atu hiero i to ratou Atua. Tera râ, ua u'ana mai te hamani-ino-raa, e aore â i oti roa te hiero no Navu i te hamanihia, ua tiahi-faahou-hia ratou i rapae i to ratou mau fare, e ua haere e imi i te hoê vahi faaeearaa i roto i te hoê medebara, e vahi aore roa hoê taata e hinaaro.

Ua haamata faahou te tautooraa e te faatusiaraa a rohi ai ratou e maha ahuru matahiti no te patu i te hiero no Roto Miti o te ti'a nei ma te hanahana i te aroa i tera'e noa'e pae apatoa ia tatou tei tae mai i ô nei i teie mahana i roto i te Fare Amuiraa.

E faatusiaraa rahi tei pupuhia i roto i te parau no te paturaa i te hiero e no te haereraa i te hiero. E rave rahi melo tei haa e tei rohi ia roaa ia ratou e i to ratou utuafare te mau haamaitairaa e itehia i roto i te mau hiero o te Atua.

No te aha te mau taata e rave rahi e horo'a rahi ai no te farii i te mau haamaitairaa o te hiero ? Te feia o te maramarama nei i te mau haamaitairaa mure ore no roto mai i te hiero, ua ite ia ratou e, aita e tusia rahi atu, aita e hoo teimaha atu, aita e tautooraa fifi atu no te farii i te reira mau haamaitairaa. E ratere ratou noa'tu te huru o te atearaa, eita ratou e fati i raro a'e i te mau faatafifiraa e aore râ, e faaoroma'i ratou i te mau haape'ape'araa atoa.

mau tamarii i ônei, e e oaoa ratou e o outou atoa i te ohipa ta outou i rave. »⁵ E au mau taea'e e au mau tuahine, na tatou e rave i teie ohipa.

I roto i to'u iho utuafare, ua tupu te tahi o ta matou mau ohipa mo'a roa a'e e te faufaa rahi a amui ai matou i roto i te hiero no te rave i te mau oro'a taati-raa no to matou mau tupuna i pohe ra.

Mai te mea e, aita â outou i tae i te hiero, e aore râ, mai te mea e, ua *tae* outou i te hiero, tera râ, aita outou i ti'amâ i teie taime no te farii i te hoê parau faati'a, te titauroa faufaa roa a'e no outou, maori râ, te faati'amâraa ia outou no te haere i te hiero. Ta outou tusia o te faaauraa ia i to outou oraraa i ni'a i te mau mea i titauhia ia outou no te farii i te hoê parau faati'a, penei a'e na roto anei i te faaru'eraa i te mau peu maoro tei tape'a noa ia outou eiaha ia ti'amâ. Penei a'e o te faatupuraa ia i te faaroo e i te haapa'o e titauhia no te aufau i ta outou tuhaa ahuru. Noa'tu te huru o te fifi, a faati'amâ ia outou no te tomo i roto i te hiero o te Atua. A titau ia roaa ia outou te hoê parau faati'a no te hiero e a faaairo i te reira mai te hoê tao'a faufaa rahi na outou, i te mea e, e tao'a faufaa rahi mau te reira.

Mai te mea e, aita outou e tomo i roto i te fare o te Fatu, e aita e farii i te mau haamaitairaa atoa e tia'i maira ia outou i reira, aita ia outou i farii i te mau mea atoa ta te Ekalesia e horo'a na outou. Te mau haamaitairaa teitei a'e o te ti'araa melo i roto i te Ekalesia, o te mau haamaitairaa ia e fariihia i roto i te mau hiero o te Atua.

I teie nei, e au mau hoa apî i roto i to outou tau apîraa, ia vai tamau noa te hiero ei titauroa na outou. Eiaha e rave i te hoê mea o te tape'a ia outou eiaha ia tomo i roto i to'na mau uputa e ia farii i te mau haamaitairaa mo'a e te mure ore i reira. Te haapoupou nei au i te feia o te haere tamau nei i te hiero no te rave i te bapetizoraa no te feia i pohe, ma te ti'a i ni'a i te po'ipo'i roa, ia ti'a ia outou ia rave i te bapetizoraa hou a haamata ai te haapiiraa. Te mana'o nei au e, aita e ohipa maitai atu no te haamata i te hoê mahana.

E te mau metua e tamarii na'ina'i ta outou, te hinaaro nei au e faaite atu ia outou i te tahi a'oraa paari no roto mai



i te peresideni Spencer W. Kimball. Ua parau oia e : « E ohipa maitai roa mai te mea e ... e tuu te mau metua i te hoê hoho'a o te hiero i roto i te mau piha atoa o to ratou fare, ia ti'a i ta [ratou mau tamarii], mai to ratou tamarii-rii-raa, ia hi'o i taua hoho'a ra i te mau mahana atoa [e tae roa'tu i te taime] e riro mai ai te reira ei tuhaa no to [ratou] oraraa. Ia tae'ahia te matahiti e titauhia ai [ratou] ia rave i [te]faaotiraa faufaa roa [no ni'a i te haereraa i te hiero], ua oti a'e na ia i te ravehia ».⁶

Te himene nei ta tatou mau tamarii i roto i te Paraimere :

*E mea au na'u ia hi'o i te hiero.
E tomo vau i roto i te hoê mahana.
E rave au i te fafauraa e to'u Metua ;
E euhe au ia haapa'o.*⁷

Te taparu nei au ia outou ia haapii i ta outou mau tamarii i te faufaa o te hiero.

E nehenehe te ao nei ia riro ei vahitapu i te fifi no te ora. E mea pinepine tatou i te haatihia e te mau mea e haamou ia tatou. Mai te mea e, e haere outou e o vau nei i te fare mo'a o te Atua, e mai te mea e, e haamana'o tatou i te mau fafauraa ta tatou e rave i roto, e ti'a ia ia tatou ia amo i te mau tamataraa atoa e ia upooti'a i te faahemaraa tata'itahi. I roto i teie vahitapu mo'a e itehia ia tatou te hau ; e faaapihia e e haapuiahia tatou.

E teie nei, e au mau taea'e e au mau tuahine, te hinaaro nei au e parau atu no ni'a hoê hiero toe hou a faaoti ai au. Eita e maoro roa, a ti'a mai ai te mau hiero apî ati a'e te ao nei, e ti'a mai hoê i roto i te hoê oire tei riro mai ei oire a 2.500 matahiti i teie nei. Te parau nei au no te hiero o te patuhia nei i teie nei i roto i Roma, i Italia.

E fare no te Atua te mau hiero atoa, hoê â to ratou faaohipararaa, e hoê â mau haamaitairaa e hoê â mau oro'a. E mea taa ê roa te hiero no Roma, inaha, te patuhia nei oia i roto i te hoê o te mau vahitapu aamu tuiroo roa i te ao nei, te oire i reira na aposetolo, o Petero e o Paulo, i poro ai i te evanelia a te Mesia e ua taparahi-pohe-hia raua.

I te ava'e atopa i ma'iri a'e nei, a putuputu ai matou i ni'a i te hoê vahitapu faaapu nehenehe roa i te poro apatoerau hitia o te râ o Roma, na'u i horo'a i te pure haamo'araa a faa-ineine ai matou ia tapu i te repo. Ua tupu te mana'o puai i roto ia'u ia ani atoa i te toofa no Italia o Lucio Malan e te mono tavana Giuseppe Ciardi, ia amui atoa mai i rotopu i te mau taata matamua e huri i te ope repo. Ua ohipa raua tata'itahi i roto i te faaotiraa ia faati'a ia tatou ia patu i te hoê hiero i roto i to raua oire.

E mea faarumaruma rii te mahana, tera râ, e mea mahanahana, e noa'tu e, ua fatata te ûa i te topa, hoê e aore râ, e piti ana'e topata tei topa mai.

A himene ai te pūpū himene nehenehe, na roto i te reo italia, i te himene nehenehe ra « Auê te Varua o te Atua, » ua tupu te mana'o i roto i te mau taata atoa e, mai te huru ra e, ua amui te ra'i e te fenua i roto i te hoê himene hana-hana no te arue e no te haamaitai i te Atua Manahope. Ua putapū roa te aau.

Te vai ra te mahana, e farii ai te feia faaroo i roto i teie Oire Mure ore, i te mau oro'a mure ore i roto i te fare mo'a o te Atua.

Te faaite atu nei au i to'u mauuru hopea ore i to'u Metua i te Ao ra no te hiero e patuhia nei i Roma i teie nei, e no to tatou mau hiero taatoa, i te mau vahia atoa. Te ti'a tata'itahi nei te reira ei mau mori no to te ao nei, ei faaite-
raa no to tatou iteraa papū e, te ora nei te Atua to tatou Metua Mure Ore, te hinaaro nei Oia e haamaitai ia tatou, e ia haamaitai i Ta'na mau tamaiti e Ta'na mau tamahine o te mau u'i atoa. Ua riro to tatou mau hiero tata'itahi ei faaiteraa no to tatou iteraa papū e, te oraraa i muri a'e i te pohe, te vai mau ra ia te reira e te papū ho'i, mai to tatou oraraa i ni'a i te fenua nei. Te faaite papū nei au i te reira.

To'u mau taea'e e mau tuahine, ia horo'a tatou i te tusia e hinaarohia no te haere atu i te hiero no te farii i te varua o te hiero i roto i to tatou mau aau e to tatou mau fare. Ia apee tatou i te mau taahiraa avae a to tatou Fatu e Faaroo, o Iesu Mesia, o tei horo'a i te tusia rahi roa a'e no tatou, ia roaa ia tatou i te ora mure ore e i te faaiteiraa i roto i te basileia o te Metua i te Ao ra. Teie ta'u pure haehaa, e te pūpū nei au i te reira na roto i te i'oa o to tatou Faaoa, o Iesu Mesia te Fatu, amene ■

TE MAU NOTA

1. Joseph F. Smith, i roto Conference Report, Atopa 1902, 3.
2. A hi'o Vilson Felipe Santiago e Linda Ritchie Archibald, « From Amazon Basin to Temple », *Church News*, 13 no mati 1993, 6.
3. A hi'o C. Jay Larson, « Temple Moments: Impossible Desire », *Church News*, 16 no mati 1996, 16.
4. Heber C. Kimball, i roto Orson F. Whitney, *Life of Heber C. Kimball* (1945), 67.
5. *Te Mau Haapiiraa a te Mau Peresideni o te Ekalesia : Joseph F. Smith* (1998), 247.
6. *The Teachings of Spencer W. Kimball*, nene'iraa Edward L. Kimball (1982), 301.
7. Janice Kapp Perry, « Oh ! J'aime voir le temple ». *Chants pour les enfants*, 99.



Na Elder Richard G. Scott

No te Pūpū no te Tino Ahuru Ma Piti Aposetolo

Te mau Haamaitairaa Mure ore o te Faaipoiporaa

E auraa rahi a'e to te taatiraa hiero i te oraraa e orahia ra. E tauturu te reira ia outou ia haafatata te tahi e te tahi, e ia itehia te oaoa rahi a'e e te faaotiraa.

Eporo'i nehenehe mau teie tei faaitehia mai e teie pūpū himene faahiahia, te mana'o nei au, e ho-ho'a oraraa no e rave rahi o tatou : « te tamataraa ia riro mai ia Iesu ».

I te 16 no tiurai 1953, ua tuturi maua o Jeanene here ei na taata faaipoipo apî i mua i te fata i roto i te hiero no Manti i Utaha. Na te peresideni Lewis R. Anderson i faaohipa i te mana taati e ua parau ia maua ei tane e ei vahine faaipoipo, faaipoipo-hia no te tau e no te tau amuri atu. Aita to'u e mana no te faataa i te hau e te marû tei tae mai na roto i te haapapūraa e, mai te mea e, e tamau noa vau i te ora ma te ti'amâ, e ti'a ia ia'u ia parahi i piha'iho i ta'u Jeanene here e ta maua mau tamarii e amuri noa'tu, no te oro'a mo'a tei ravehia na roto i te mana autahu'araa ti'a i roto i te fare o te Fatu.

Ua taatihia ta maua nau tamarii e hitu i ni'a ia maua na roto i te mau

oro'a mo'a o te hiero. Ta'u vahine tao'a rahi, o Jeanene, e e piti o ta maua mau tamarii, tei ô mai ia ratou i te paruru. Na ratou e horo'a mai nei i te mau faaitoitoraa i te mau melo tata'itahi o to matou utuafare e toe nei, ia ora ma te parau-ti'a ia ti'a ho'i ia matou paatoa ia farii i te taatoaraa o te mau haamaitairaa tei fafauhia i roto i te hiero.

E piti o na pou tumu o te paturu nei i te faanahonahoraa o te oaoa a te Metua i te Ao ra, maori râ, te faaipoiporaa e te utuafare. Te tautoo nei Satane ma te tuutuu ore, ia haaparari i te utuafare e ia faaiti i te auraa o te mau oro'a o te hiero, o te taamu amui i te utuafare no amuri atu. E faaiteraa teie no te auraa rahi o teie na pou rahi e piti. E auraa rahi a'e to te taatiraa hiero i te oraraa e orahia ra. E tauturu te reira ia outou ia haafatata te tahi e te tahi, e ia itehia te oaoa rahi a'e e te faaotiraa i roto i te tahuti nei.